

Pergunta ba kada Kandidatu Prezidente da RDTL

La'õ Hamutuk nia pergunta ba Kandidatu sira iha Eleisaun periodu 2017-2022

Pergunta jerál ba Kandidatu sira hotu
<ol style="list-style-type: none">1. Saida mak sai ita boot nia <i>vizaun estratéjiku</i> atu lori povu no nasaun Timor-Leste durante tinan lima oin mai karik povu hili ita boot nudár Timor-Leste nia Prezidente da Repúblika?2. Saida mak sei sai ita boot nia vantajen katak ita-boot nia vizaun mak di'ak liu ba Timor-Leste?3. Husi knar ne'ebé Konstituisaun define ona ba ita, ida ne'ebé mak sai prioridade no parte forte ba ita boot?
Pergunta ba asuntu polítika, demokrasia no seguransa
<ol style="list-style-type: none">1. Konstituisaun RDTL fó <i>knar importante balu ne'ebé tenke hala'õ hanesan Prezidente da Repúblika</i> saida mak ita boot nia hanoin kona ba knar sira ne'e?2. Konstituisaun hatuur ona <i>prinsípiu kona-ba haketak poder sira</i>, oinsá ita boot sei halo hodi garante "check-and-balance" ho órgaun estadu sira seluk?3. Tuir ita-boot nia hatene, <i>saida mak valor hosi "uza direitu vetu nian"</i> karik ita-boot simu diploma naran ida hosi Parlamentu Nasionál ne'ebé ita boot hanoin la tuir interese públiku?4. Konstituisaun RDTL hatete katak <i>Prezidente-Repúblika maka Xefe-Estadu, símbolu no garantia independénsia nasional no unidade estadu nian, no instituisaun demokrátika sira-nia funsionamentu regulár</i>. Saida mak ita boot sei halo atu bele garante independénsia ne'e karik ita boot nia partidu ka aliansa partidu ruma mak manán iha eleisaun parlamentár hodi forma governu?5. Nudár Prezidente ba estadu soberanu ida-ne'ebé demokrátiku, ohin loron Timor-Leste seidauk iha <i>liña fronteira tasi, terrestre no aero ida ne'ebé fixu ho nasaun viziñu sira</i>. Nune'e, saida mai ita-boot sei halo atu bele garante katak Timor-Leste sei la lakon pedasuk rai ka tasi ida ba nasaun seluk nia okupasaun?6. <i>Relatóriu Chega! fo rekomendasaun sira kona-ba estabesimentu mekanizmu kredível ba aktu sira ne'ebé akontese durante krime kontra umanidade iha okupasaun indonézia nian</i> no too ohin loron besik la-iha mekanizmu formal ida ne'ebé hala'õ hosi estadu Timor-Leste ba rekomendasaun ida ne'e. Nudár Prezidente saida mak ita boot sei halo atu hatuur justisa ba povu Timor-Leste no lori kontabilidade ba autór krime grave sira?7. Atu <i>garante estabilidade nasional no hametin liu tan instituisaun forsa defeza TL</i>, nudár komandante supremu F-FDTL transformasaun saida mak tuir ita boot nia hanoin presiza atu halo hodi hametin no hadi'ak liu tan instituisaun seguransa ida ne'e iha futuru?8. Saida mak Timor-Leste presiza halo atu <i>garante katak formasaun ba instituisaun forsa Defeza ninian tenke inkorpora asuntu direitus umanus?</i>9. <i>Estadu nia objetivu ida mak atu defende no garante demokrasia política no partisipasaun populasaun nian kona-ba rezolusaun problema nasional</i>. Hanesan Prezidente da Repúblika saida mak ita boot sei halo atu bele hametin relasaun povu ho nia ukun na'in sira?10. <i>Iha tinan 2013-2015, iha operasaun militar boot iha Timor-Leste atu buka, kaer no oho Mauk Moruk ho nia elementu sira</i>. Operasaun ida ne'e halakon tiha sidadaun sira-nia direitu no liberdade fundamentál no respeito ba estadu nia prinsípiu kona-ba direitu demokrátiku; saida mak ita-boot sei halo atu Timor-Leste labele repete tan política ida ne'e?

Pergunta ba kada Kandidatu Prezidente da RDTL

Pergunta ba asuntu ekonomia

1. Hanesan ita boot sira hatene katak agora daudaun *Timor-Leste nia estrutura ekonomia maioria depende liu ba reseita husi mina no gas* no mós ita nia ekonomia naun petrolíferu ki'ik tebes, nudár kandidatu ba Prezidente da Repúblika saida mak ita nia vizaun kona-ba dezvoltamentu sustentável?
2. Presiza ka lae atu Timor-Leste *dezenvolve nia setór agrikultura, indústria ki'ik no turizmu* importante ba Timor-Leste? Se presiza, dalan saida mak ita-boot hanoin atu Timor-Leste bele foti hodi la'o?
3. *Kampu Bayu-Undan sei maran iha tinan tolu ka hat oin mai*, sá modelu diversifikasaun ekonomia ne'ebé ita boot sei sujere ba governu no Parlamentu atu hanoin ba Timor-Leste?
4. Iha Timor-Leste, *metade populasaun barak mak sei moris iha liña pobreza nia okos*, tanba la iha kampu servisu no la iha oportunidade atu asesu ba moris di'ak nian. Saida mak ita-boot sei sujere ba Parlamentu no Governu atu halo hodi hamenus pobreza iha Timor-Leste?
5. Ema ki'ik barak mak tenke sai tiha diskriminadu iha kapitál Dili tanba de'it *Dekretu Lei kona-ba ijiene no orden públiku no política munisipiu Dili nian ne'ebé duni, hadau no bandu ema ki'ik sira, liu-liu vendedór estrada ninin sira atu fan iha jardín sira*. Saida mak PR bele halo atu hadi'ak liu tan justisa sosiál ida ne'e?
6. Parlamentu daudaun ne'e diskute hela ezbosu lei lubuk inklui *Lei Mineiru* ne'ebé sei hadalan utilizaun rai comunidade sira ba atividade ekstrativa. La'o Hamutuk hare katak Lei Mineiru ida ne'ebé sei kria problema sósiu-ekonómiku ida ne'ebé boot bainhira implementa nune'e saida mak ita-boot nia hare ba ezbosu lei ida ne'e?
7. Tinan rua ikus ne'e hatudu hela mai ita katak *Timor-Leste nia Fundu Petrolíferu iha hela dalan atu tun no hotu*. Situasaun ida ne'e akontese tanba besik tinan-tinan governu kontinua halo levantamentu barak liu Rendimentu Sustentável Estimativa (RSE) hosi Fundu ne'e. Saida mak ita boot sei sujere ba Parlamentu atu halo nune'e bele evita Timor-Leste nia Fundu Petrolíferu labele hotu lalais?
8. *Adesaun ba ASEAN sai tiha alvo ba Governu Timor-Leste dezde tinan hirak kotuk ne'e*, maske nune'e, ASEAN nia prinsipiu sira kona-ba Akordu Merkadu Livre sei fó impaktu negativu balu ba iha ita nia agrikultór no ekonomia doméstika nian. Saida mak ita-boot sei sujere ka hili hodi bele proteje Timor-Leste nia interese ekonomia no produsaun agrikultura nian bele kompete iha rejiaun ida ne'e?
9. *Zona Ekonomia Espesiál Sosiál no Merkadu no mós Projetu Tasi Mane* gasta ona osan lubuk no sei gasta biliaun ba biliaun. Ohin loron laiha estudu ekonómiku ida ne'ebé publika sai hosi Autoridade Rejiaun Autónoma Oecusse no TimorGAP, E.P ba públiku. Oinsá ita-boot bele ajuda povu sira hodi bele hetan informasaun sira kona-ba projetu boot sira?
10. Zona Ekonomia Espesiál Sosiál no Merkadu nia alokasaun orsamentál tinan-tinan sempre halo tuir kategoria *“Transferénsia Públiku”* iha Orsamentu Jerál Estadu. Oinsá ita-boot nia sujestaun atu muda alokasaun orsamentál iha futuru?

Dadus pesoál

Naran Kandidatu :

Data :

Asinatura :